


Na Biblioteca Nacional Oranjestad:

FERDINAND FRANCA LO CUMINZA CU LESNAN DI BAILE Y ACTUACION COMBINA CU LESAMENTO DI BUKI

Seccion Hubentud den Movecion a entrevista e hoben Ferdinand Franca, kende na maart venidero ta cuminsa cu lesnan di baile y actuacion, en combinacion cu lesamento di buki, manera e prome curso cu el a duna aña pasa, y e ubicacion lo ta Biblioteca Nacional Oranjestad.

"E ta e mesun lesnan cu mi a



duna aña pasa na luna di April, cu mi a caba cu un obra exitoso cu a haya hopi bon comentario. E aña aki mi ta bay dedica mas pa Aruba. Esey ta un peticion di diferente persona y di Biblioteca Nacional tambe, pa tambe hacie cu escritor nan di Aruba y duna balor na obranan local, pa asina asocia e muchanan cu nan propio identidad, y stimula nan pa aprecia mas nos cultura", Ferdinand a splica.

Ferdinand Franca a agrega cu e bailenan tambe ta bay ta puramente di Aruba, esta wals, mazurca, polca, tumba, etc.

"E actividad ta dirigi anto na e cultura di Aruba, su bailenan, y su literatura pa loke nos ta bay tene cuenta cu tur e escritor nan pa prepara e parti di actuacion.

Lo tin escritor nan cu a skirbi buki na Papiamentu, y mi ta bay tuma tempo pa obranan cla. Di e obranan mi ta bay saca pidanan cortico pa

forma un obra riba su mes, cual lo worde presenta posiblemente na final di juni, esta na cabamento di school", Ferdinand a comenta.

El a splica cu tin obranan di autor local cu a worde pone un banda caba, y cu atraves di e curso y presentacion final ta bay revivi.

"Esaki tambe lo bira un estimulo pa escritor nan hoben y esnan cu kier skirbi algo, cu por wak cu obranan di autor local ta florece, y cu nan tambe lo worde motiva pa skirbi un buki, of obra teatral.

E muchanan cu ta bay les tambe ta bay haya balor di e cultura y tradicion di Aruba, y pa loke ta baile y actua-

cion nan lo haya e bukinan skirbi na Papiamentu y escritor nan conoci", Ferdinand a expresa.

Na e momentonan aki Ferdinand no por a bisa cual ta e buki y escritor nan cu ta skirbi (of traduci) buki pa mucha cual obranan lo worde utiliza den e curso, pero den e siguiente edicionnan di Seccion Hubentud den Movecion lo bin cu mas detaye.

CANTIDAD DI MUCHA:

Ferdinand a comenta cu tin espacio pa 15 mucha pa baile y 15 pa actuacion, pues un grupo di 30, den edad di 9 pa 12 aña.

"E ta bay ta di 9 pa 12 aña

pasobra bo por traha un tiki mas cu nan, ya cu nan por lesa caba. E curso lo ta di luna di maart pa juni. E grupo aki mi lo entrena nan pa nan mes, na nan turno, por pasa e conocimiento pa otronan y nan mes por bay forma nan grupo", Ferdinand a relata.

Algun mucha cu a participa aña pasa lo tuma parti bek den e curso aki y lo keda mas of menos e posibilidad pa inscripcion di 10 mucha mas.

Fecha di inscripcion, dia y ora cu e cursonan lo tuma lugar, ta informacion cu lo bin den e transcurso di e siguiente simannan. E curso lo cuminsa ora cu carnaval pasa.

GRADICIMENTO:

Ferdinand Franca kier a manda palabranan di danki pa Biblioteca Nacional, ya cu danki na nan colaboracion e por logra di siña algun mucha di e barionan di Playa atrobe, ya cu den San Nicolas e ta bezig caba. Aya e ta dunando les di actuacion y baile caba den e school unda e ta funciona como maestro, y pa luna di februari awor posiblemente dos school mas lo participa. Muchanan di schoolnan di San Nicolas tambe lo participa den un obra grandi na final di e aña escolar cual lo tuma lugar den diferente bario pa publico en general.

Eleccion di reina di E.P.B. Hato

Diasabra awor, 3 di Februari 2001, E.P.B. Hato lo tin su grandioso eleccion di Reina Grandi y Reina Juvenil. E evento aki lo tuma lugar na Centro Bolivariana (Plaza Simon Bolivar), na unda 20 candidata lo competi pa e coronanan. Bin apoya bo candidata, for di 5 or di atardi caba e publico por bin prepara. E musica lo ta den man di miniteca Migé. E anochi aki ta priminti di bira algo grandi, manera nos scol. Pa reina juvenil ta participa Julissa Vrolijk, Shamine Karyodinomo, Lisandra Geerman, Sharabi Mercera, Melisa Andrade, Roxana Effer, Darlyn Chong, Jenimar Falcon, Lisa Petronia, Charityn Kock, Zulaika Rozenberg y Indira Stok. Pa Reina Grandi tin Donna Lee Downey, Doracelyne Nicolaas, Daysyree Croes, Minerva Maduro, Monique Maasdamme y Elizabeth Reyes. E reina Juvenil y Grandi cu sali lo bai representa E.P.B. Hato na e eleccion Escolar cu lo wordo teni proximamente. Di parti di e Comision Organizador un palabra di exito na tur e candidatanan.

